



Komunikadu Imprensa
Tribunál Distritál Dili
29 Marsu 2019

JSMP konsidera Tribunál halo desizaun ne'ebé la justu ba kazu inkumprimentu ba obrigasaun alimentar

JSMP konsidera Tribunál halo desizaun ne'ebé la justu ba kazu inkumprimentu ba obrigasaun alimentar ne'ebé envolve arguidu JMRX hasoru nia oan na'in rua ne'ebé sei iha idade menór; KMS no ORX ne'ebé representa hosi menór sira nia-inan rasik, PCPAS, iha 04 Feveireiru 2019.

JSMP konsidera desizaun ne'e la justu tanba Tribunál la útiliza meius hotu ne'ebé define iha artigu 116 kona-ba meius ba provas ne'ebé admisivel hosi Kódigu Prosesu Penál hodi konsidera ba faktu relevante sira inklui rekolla faktu sira seluk bainhira mosu duvida ruma. Tuir loloos Tribunál tenki husu arguidu atu apresenta prova dokumental bazeia ba artigu 132 KPP hodi justifika kona-ba arguidu nia deklarasaun relasiona ho inkumprimentu ba akordu obrigasaun ba alimentasaun bainhira arguidu apresenta razaun katak arguidu nia-negosiu sofre bankrota iha 2015 ba leten, Maibé tribunál la halo ida ne'e no fiar deit ba arguidu nia deklarasaun ne'ebé justifika iha tribunál nia desizaun.

“JSMP fiar katak absolvisaan la'os desizaun ida ne'ebé justu iha kazu ne'e, tanba arguidu rekoñese katak nia la kumpri nia obrigasaun hodi alimenta menór sira inklui responsabiliza ba menór sira nia propinas tuir akordu sein apresenta razaun ne'ebé auténtiku tuir lei haruka,”dehan Luis de Oliveira Sampaio, Diretór Ezekutivu JSMP.

JSMP mós lamenta teb-tebes ho juis nia linguazem ne'ebé hateten katak "kazu ne'e kazu kiik-oan no normal akontese". JSMP fiar katak tuir loloos linguazem sira hanesan ne'e labele sai hosi juis ida-ne'ebé prezide julgamentu ne'e ka autoridade judisiál sira seluk tanba bele fó motivasaun no konvense arguidu no ka comunidade enjerál atu kontinua prátika aktu krime hanesan, tanba sira iha hanoin katak kazu ne'e kazu kiik no normal kuandu akontese.

Antes ne'e, iha 2015 entre arguidu ho menór nain rua nia inan halo akordu ba mutual no ho konsentimentu kona-ba akordu divorsiu¹ ne'ebé deskreve arguidu ho menór sira nia inan nia obrigasaun hodi tau matan ba menór sira kada fulan 6 troka-malu no arguidu rasik sei responsabiliza másimu ba menór sira nia propinas. Arguidu ho menór sira nia inan konkorda no asina akordu ida-ne'e.

¹Akordu iha divorsiu ho mútuo konsentimentu iha 24/12/5, ho NUC 1541/14.CVTDD

Maibé, iha realidade arguidu la kumpri nia dever hotu, ho nune'e menór sira nia inan hatama prosesu hasoru arguidu katak arguidu nunka alimenta menór sira inklui obrigasaun tuir akordu atu selu menór sira nia propinas.

Iha Tribunál, arguidu rekoñese ba faktu sira hotu katak nia la selu menór sira nia propinas tanba menór sira nia inan transfere menór sira hosi eskola públiku ba eskola privadu internasionál ne'ebé nia kustu karun tebes la tuir arguidu nia kapasidade finanseiru maske arguidu iha koñesimentu tanba sira nia inan informa ba nia. Arguidu konfirma mós ba faktu sira balun katak arguidu hetan rendimentu US\$32.000 kada fulan hosi projetu ne'ebé nia halo maibé ida ne'e la'os iha tinan rua kotuk, tanba arguidu nia projeitu momentu ne'ebá monu alias bankarota (falidu) no la'o iha divida nia leten.

Arguidu mós konfirma katak nia la fó alimentasaun duni ba menór sira tanba momentu ne'ebá menór sira prefere liu hela ho sira nia inan duke ho arguidu. Aleinde ne'e menór sira nia inan mós iha kapasidade atu sustenta ka alimenta menór sira tanbá menor sira nia-inan mós nu'udar emperezaria. Arguidu hatutan katak momentu divorsiu nia intrega hela kareta trek ida ho prado ida hodi transporta no fasilita menór sira ba eskola inklui atu kontinua dezenvolve menór sira nia inan nia kompañia karpentaria. Hafoin arguidu nia kompañia dezenvolve di'ak fali, arguidu intrega osan US\$40.000 nu'udar osan hodi fó fali menor sira nia inan nia osan ne'ebé uza hodi selu menór sira nia eskola inklui ba alimentasaun durante tinan rua nia laran.

Iha parte seluk, menór nia inan (PCPAS) rejenta totalmenta arguidu nia deklarasaun no argumentu sira. PCPAS deklara katak arguidu nunka fó osan nein sentavus ida ba menór sira satan fó alimentasaun. Nia klarifika katak iha momentu ne'ebá arguidu intrega duni osan ho valor US\$40.000 maibé ida ne'e nia osan ne'ebé arguidu debe hodi atu hamoris fali nia kompañia. PCPAS mós apresenta resivu orijinal selu menór sira nia propinas ba iha tribunál. Nia mós rejenta kona-ba kareta rua ne'e tanba tuir nia katak ida-ne'e halo parte iha akordu divorsiu iha prosesu fahe sasan ne'ebé hetan durante kazamentu, enkuantu arguidu rasik abandona ona menór sira desde 2004.

Aleinde ne'e, menór KMS mós rejenta tomak arguidu nia deklarasaun no haktuir katak arguidu (sira nia aman) nunka selu sira nia eskola, satan fó osan ba alimentasaun. KMS konfirma katak iha momentu balun nia aman haruka duni ema ida fó osan US\$100.00 dala ida, maibé depois ida ne'e nunka fó tan.

JSMP fiar katak, faktu sira ne'e hotu hatudu momós katak arguidu provadu duni komete krime la kumpri nia obrigasaun hodi alimenta menór sira. Desizaun ne'e afavór de'it ba arguidu sein apresenta dokumentu auténtiku ruma. Tuir loloos tribunál tenke husu ba arguidu atu apresenta faktu sira hodi konfirma ba arguidu-nia rendimentu iha momentu ne'ebá. Pior liu, tribunál afavór

Rua Beco Lacateu, Aldeia ,Manu Fuik, Colmera, Dili Timor Leste

PoBox: 275

Telephone: 3323883 |77295795

Website: <http://jsmp.tl>

Facebook: www.facebook.com/timorleste.jsmp

Twitter: @JSMPtl

ba arguidu nia deklarasaun kona-ba arguidu labele asume nia funsaun hodi alimenta menór sira tanba menór sira hili liu hela ho sira nia inan.

JSMP intende katak desizaun hotu iha prosesu obrigasaun ba alimentasaun ho objetivu prinsipál atu salva menór sira-nia ben-estar no interese. Tanba ne'e, menór sira bele hili hela ho sede'it dezde sira sente hakmatek no konfortavel. Maibé ida-ne'e nunka bele sai razaun ba arguidu atu hases nia obrigasaun hodi alimenta menór sira. Satan ho tribunál nia razaun katak “mezmuke tuir loloos arguidu iha responsabilidade atu fornese alimentu ba menór sira, maibe realidade menór sira nunka infrenta falta ba alimentasaun ka nessesidade sira seluk²”.

JSMP diskorda ho tribunál nian fundamentasaun ida-ne'e tanba haree ba faktu hotu, menór sira la infrenta falta alimentasaun tanba sira nia inan mak únika asume tiha knaar ne'e hodi hases tiha perigu potenciál hasoru sira bainhira arguidu abandona nia obrigasaun.

Tribunál nunka bele uza razaun tanba menór sira nia kondisaun atuál antesipa hosi PCPAS, hodi permite arguidu bele abandona nia obrigasaun no la kumpri desizaun tribunál nian.

Tribunál mós la devia inklui faktu kona-ba arguidu intrega kareta marka prado ho folin 35.000 ba lezada sira nia inan hodi sai motivasaun fundamentasaun iha desizaun katak arguidu iha intensaun apoia ba menór sira nia eskola, tanba kareta ne'e halo parte hosi sira nia akordu divorsiu ne'ebé inklui iha prosesu fahe riku soin.

Kazu ne'e rejistu iha tribunál ho número prosesu 0415/17.PDDIL, prejide hosi juis titulár Albertina das Neves, enkuantu prokuradór representa hosi Dr. Bartolomeu Barros no defeza representa hosi Advogadu Privadu Dr. Manuel Tilman.

Atu hetan informasaun liutan bele kontaktu:

Luis de Oliveira Sampaio
Diretór Ezekutivu JSMP
Email: luis@jsmp.tl
Website: <http://jsmp.tl>

² Pájjina 7, desizaun Tribunál Distritál Dili ba prosesu NuC 0415/17.PDDIL, 04 Marsu 2019.